

هاي اقبور لحياب يسفي اعليها لتراب

الله يا زمن من هاي المحن ويا عظم المصيبة

وصل الحجة للبقيع بحسره وبالعبره منكسر قلبه حاير
شاهد بعينه ومنه طلعت زفره جن جمره لا قلبه لا مناير
شنهو يسلي قلبه ياهو يصبره والعتره متوسّده المقابر
مُرّة بعيونه الدنيا صارت مرّة ومتوجره نيرانه لكن صابر

يهمل دمة العين ويخفي بقلبه لونين

من طاف وسعى يلهج بالدعا ويا عظم المصيبة

هاي اقبور لحياب يسفي اعليها لتراب

الله يا زمن من هاي المحن ويا عظم المصيبة

أربع اقبور امهدمه وتسطع نور بالديجور وبالعزة والمكارم
وبس الحمام الما يمنعه أي سور جاها يزور ويجدد المراسم
وانته تزور بجنح لكن مكسور يا منصور دمك يحسره ساجم
وارض البقيع تتاشدك يمتى تثور يمتى تثور وسيفك يرد مظالم

ندري كاشف الراس بحسرة تصعد انفاس

وبعيونك غضب من تسمع عتب ويا عظم المصيبة

هاي اقبور لحياب يسفي اعليها لتراب

الله يا زمن من هاي المحن ويا عظم المصيبة

وصل لقبر الصادق وظل مفجوع يجري ادموع وينادي آه يا جدي
اذكرك بفراش المنية موجوع قلبي يلوع وناعي المراثي يحدي
من يوم حرق الدار وكسرت لضلوع ظل مزروع جم ثار ونابت عندي
واقف على قبرك رمش عيني اشموع حزن يضوع ورايد أحقق وعدي

قلبي ممثلي غيظ فيض ويتبعه فيض

ثاراتي شكر جمرى يستعر ويا عظم المصيبة

هاي اقبور لحياب يسفي اعليها لتراب

الله يا زمن من هاي المحن ويا عظم المصيبة

والله يبو الكاظم يبجني الحال والأهوال يصعب علي طاريها
كلما أهيم بغربتي طل مرسال وعنكم قال جمرة حزن يوريها
قللي شعدد شل يمر اعلى البال من أفعال وكل الخلق تدريها
ما يبرد بقلبي الحزن مهما طال تدري امحال ودمعاتي دم أجريها

شللي يبرد الثار نار وتاكل النار

أتنفس وجع دلالي انفجع ويا عظم المصيبة
